

17 warga asing masuk secara haram dipenjara, sebat dan diusir

MIRI: Seramai 17 warga asing termasuk tiga wanita masing-masing dijatuhi hukuman penjara empat bulan dan sekali sebatan oleh Mahkamah Sesyen di sini, semalam atas kesalahan masuk ke negara ini secara haram.

Mahkamah turut memerintahkan kesemua tertuduh dirujuk ke Jabatan Imigresen untuk tujuan pengusiran setelah selesai menjalani hukuman penjara kelak.

Joseph Abita Gerola, 31, dari Filipina; Albertus (23), Junaimah (33), Rio Sandi (39), Sumiati (35), Muhamad Bachtiar Firmansyah (25), Jaka Suseno (38), Julianto

(24), Panji (22), Haris Syai-fulla (23), Sulaiman Boli (55), Bernadus Romi (26), Masyitah (33), Josep (37), Baharuddin (43), Yohanes Lele Lado (24) dan Fransiskus Malo (29) dari Indonesia telah didakwa mengikut Seksyen 6 (1) (c) Akta Imigresen 1959/63 (Pindaan 2002) dan dihukum di bawah Seksyen 6 (3) akta yang sama.

Mengikut kesalahan ini, kesemua tertuduh boleh dikenakan denda tidak melebihi RM10,000 atau penjara tidak melebihi lima tahun atau kedua-duanya sekali serta boleh disebat sehingga enam kali, jika sabit kesalahan.

Menurut keterangan kes, kesemua tertuduh telah ditahan oleh pihak Jabatan Imigresen hasil serbuan di tujuh lokasi berasingan di sekitar Miri termasuk Long Lama, Baram antara jam 3.20 petang, 13 Mac lalu hingga jam 3 pagi, 14 Mac lalu untuk tujuan pemeriksaan kerana dipercayai warga asing.

Hasil pemeriksaan mendapati seorang tertuduh yang berasal dari Filipina dan 16 yang lain dari Indonesia telah gagal menunjukkan sebarang dokumen perjalanan sah yang membenarkan mereka memasuki dan tinggal di negara ini.

Berikutan itu, kesemua

tertuduh telah ditangkap dan dibawa ke balai polis untuk tindakan lanjut.

Setelah mendengar pengakuan bersalah kesemua tertuduh, mahkamah kemudian menjatuhkan hukuman penjara empat bulan dan sekali sebatan ke atas kesemua 14 tertuduh lelaki, sementara tiga tertuduh wanita hanya dipenjara empat bulan dan dikecualikan hukuman sebat.

Pendakwaan kes dikendalikan pegawai pendakwa Abdul Sophian Mohamad di hadapan Hakim Azreena Aziz, manakala kesemua tertuduh tidak diwakili peguambela.